



Ассаламу Гялайкум!

БАРХЬДЕШЛА ГҮНИ

РАЙОННА ЖАМИГЯТЛА-ПОЛИТИКАЛА ГАЗЕТА

№ 18 (81433), МАЙЛА 9, ТАЛАТ, 2023-ИБИЛ ДУС, БАГЬА 8 КҮУР.

«Путь истины»

1938 ИБИЛ
ДУСЛИЧИБАД
ДУРАЙУСИ САБИ

Основана
в 1938 году

УЧРЕДИТЕЛИ:

Администрация МО «Акушинский район» Республики Дагестан,
Собрание депутатов МО «Акушинский район» Республики Дагестан,
редакция газеты «Путь истины» МО «Акушинский район» РД.



«АХЪУШАЛА РАЙОН» МО-ЛА АДМИНИСТРАЦИЯЛА БЕК1 М. КЬ. Г1ЯБДУЛКАРИМОВЛА МУБАРАК

Х1урматла районна халкъ!

Урк1и-урк1иларад мубаракдирулра х1уша Чебях1си Чедибешла Барх1ила байрамличил! Ил байрам нушала г1ямрулизиб бег1лара мяг1ничеси саби. Лерилра царх1илти байрумтас ил саби хъулчи.

Нушани ишбарх1и гъанбиркахъулра улкала халкълис даршту г1яму сархиби адамти, Ват1ан багъандан алхунти г1ях1гъубзни, давила майдайчир гъунарти ва гъабзадеш чедаахъти бургъантан. Нушачиб чеси саби Ват1ан берцахъес бургъули калунтала баркъудиличи лайикътили диэс къайгъи-барни, дурх1назир ва жагъилтазир Ват1айчи диги, Ват1айс мардеш адикъни, г1ях1гъубзнала гъунартас марли биэсли илдас бархъси бяркъ бедни.

Ахъушала районна халкълира Чедибеш сархнилизи мяг1ничеси пай кабихъибси саби. Арали датабая лерилра!



РАЙОННА ДЕПУТАТУНАЛА СОБРАНИЕЛА ПРЕДСЕДАТЕЛЬ С. Х1. Х1ЯЖИГ1ЯЛИЕВЛА МУБАРАК

Чедибешла Барх1ила байрам нушаб бег1лара дурхъаси саби. Араг1ебли дунъялис халаси къадрила байрам саби ил, сесад къайгъи барапла Россия х1ейгутани, сунела асар камбияхъес имканх1ебик1уси. Ил байрам саби дунъяла халкъличибад фаизмала балагъ чебарбукнила, миллионти адикътас чула жан дерцахъес Советский г1яскортани кумекбарнила.

Нушани, Россияла адамтани, Чедибешла байрамла х1урмат калахъес сесад халаси къайгъи барах1еллира, илцадра гъамадли бирап Чедибеш сархитала гъунар ва гъабзадеш хъумх1ертхъес. Ил сабабли х1яжатбиркур давила анц1букуначила, Чедибеш сархитала гъабзадешлиши дурх1нази ва жагъилтази имц1али бурес, челябкъализиб илдашила хабар зяйбик1ули калахъес. Вирхулра дявтазир сархити гъунартас, гъабзадешлис нуша марли калес бажардидиркнили.



ВОЕННЫЙ КОМИССАР Ш. М. ЧУПАЛАЕВЛА МУБАРАК

Чебях1си Чедибеш сархит1еичирад 78 дус ардякъи сари. Ц1акъти дявтала майдайчир чула ч1умадеш ва гъабзадеш чедиахъули бургъутири Дагъиста лерилра миллатунала, илдала луг1илизиб Ахъушала районнисибадти бургъантира.

Дявтала дусмала къиянти чекасили, дуги-х1ери цадарили, лерилра х1янчи чули бек1дирули, паргъатдеш агарли бузутири рузби, рурсби, дурх1ни, бухънаби. Илбагъандан Чебях1си Чедибешлизиб илдала пайра халаси саби.

Дигулра гъарилла хъулиб разидеш, улкализиб паргъатдеш диубли!



Писки Мях1ла поэзияла хазнализибад

ЧЕДИБДЕШ САРХИБТАС

Х1уша бег1ла черях1ти
Дезначи лайикътира,
Лерил замунтазир
Миц1ирли лертиванра.

Х1ушачи мешубикес
Жагъилти-- къайгъилизиб,
Бебк1аагарти х1ушаб
Г1яшли икрамбирули.

Г1яндбак1или даимлис
Гитлерла гъармукиби,
Х1ушани калахъунра
Нушаб дурхъал Ват1анра.

Нушаб иш шаладешра,
Нушаб иш азаддешра,
Нушаб авадандешра,
Нушаб иш х1улбук1ира.

Нушаб иш разидешра,
Нушаб шалал г1илмура,
Нушаб х1екъси талих1ра
Нушаб х1улк1ути х1ебра.

Нушаб къац1ра, къуватра,
Нушаб иш эркиндешра,
Нушаб иш ванадешра
Нушаб дурхъал далайра!

Г1ЯСКУРТАЗИ АРКЬУТИ ЖАГЬИЛТАС

Къаплантиван ах1макъти
Нешанани даркъиби,
Арслантиван залумти
Дудешуна айкъурти.

Неш -Ват1айс къуллукъбарес
Г1яскарлизи аркъути,
Гъунби г1ях1дираб х1ушаб,
Талих1черти жагъилти!


Х1ушала саркъибси х1ер
Биаб душмантас загъру,
Тяп ургиван алт1уси
Дирутачи гуж-зулму!

Дергълис х1ядурдариби
Даргх1едердахъес дару,
Х1ушала ц1акъ, гъунарти
Диаб душмантас бару!

Байрахъван ахъдуцая
Дубурланна намус- ях1,
Нешван мях1камдарая
Ах1ерси Ват1анна дях1!

Душман урехила сай
Бяхъибси жаниварван,
Чемабуркъаб гъубзнаци
Харждарес г1язизти жан!

ЧЕБЯХІСИ ЧЕДИБДЕШЛІС



**Суратлизив: Сумен Къурбанов.
Советский Союзла Игит,
Мух1ела ши.**

Ахъушала районнисибад Чебях1си Ват1а дургъбази арбакъунти саби 3656 адам. Ват1ан багъандан дявила майдайчиб алхун 1856 адам. Дявата бут1акъянчибала дурусли луг1и кабизахъес багъандан чекабизурли х1янчи барип районна музейла директор Зубалжат Мирзаевани, районна ЦБС-ла директор Жамиля Г1ябдулаевани, военкоматла вахх1ила х1янчизар Мях1яммад Мях1яммадовли, Семгамахыла урга даражала школала учительница Салимат Х1яжиевани.

Миц1ирли чарбухъунтани халкъла г1ямрула шурт1ри г1ях1диахъес, шила хозяйство ахъбуцес бузули, дурх1нази, жагъилтази г1якълума бугъули, царх1илтас г1ибратли бетаури г1ямру дерк1иб.



**Суратлизив: Г1ябдулла
Шамакхиев, Т1ант1ала ши.**

Бег1лара бахъал дявата бут1акъянчиби буили саби Ахъушала шилизибад. Илдазибад бахъалгъунти пачалихъла ахъти наградабачил чарбухъунтири. Мях1яммадов Мирзах1яжи Советский Союзла Игитла уличи гъалаихъили уйбиси сай.

Мирзах1яжини ва Бях1яндов Мях1яммадли Ленинна орден сархиси саби. Зубайрух1яжи Салих1овли бек1дешдирти бургъантани фашистунани баргаэс х1ядурбарибси Одессала оперный театр берцахъибси саби.

Наградаби касиби-ургаб лебтири ах1макты разведчикуни Г1ямар Т1алх1ятов ва Г1яли Мях1яммадов; бургъантини Г1ябдула Даудов, Г1ябдулла Булатов, Расул Сяг1идов, Г1исах1яжи Мях1ям-

мадов, Г1ябдулла Мях1яммадов, Зубайрух1яжи Мях1яммадов. Мях1яммад Г1ямаровхъали лебтири х1ябал-- х1ябалра наградабачил чарбухъунтири. Мях1муд Г1ямаров вири дебали паргъятси адам, бурули бири илини тупанглизибад игъубси х1ярх1я бензобаклизи чегахъили, фашистунала самолет кабикахъибси сай или.

Г1ялих1яжи Г1ябдулаев сайри Сталинград багъанданси дявла бут1акъянчи. Сталинград багъандан бургъули калунти-ургаб буили саби Ахъушала районнисибадти 39 адам. Илдазибад миц1ирли хъули чарбухъунти 8 сабри: Ахъушабадти Г1ябдулаев Г1яли-Х1яжи ва Г1ябдулаев Мях1яммад, Балхъарла шилизибадти Г1ябдулаев Дибирх1яжи ва Г1умаров Г1иса, Бурх1имякъмахылилизивадси Г1ябдулаев Гъазимъх1яммад, Гъебала шилизибадси Х1яжиеев Х1яжи, Уллучарала шилизибадси Х1ясанов Рамазан ва Урхъучимахылилизивадси Ражабов Мях1яммад.

Ахъушала шилизирадси Жарбаева Г1яйшат районнисирад цайли цаси хъунул адам сарри дявата бут1акъянчи. Дургъбазир зенитчици калунсири. Ил миц1ирли хъули чаррухъун, адамти дебали дигахъуси, къугъали хабар буруси, г1ях1си хъунул адам рири.

Ахъушавадси жагъиль лётчик Чамкуров Кимли Ват1ан багъандан жан дедиб. Бурули бири илала дудеш Чамкуров Гъазимъх1яммад Ахъушала районнисибад комсомолла райком ак1ахъубх1ели, цаибил секретарь варибси, мискин халкъ г1еббурцуси, г1ямрула даражада ахъбуцес урк1и-урк1илавад узуси адам уйбиси сай, илини сунела уршилис Ким ибси у «Коммунистический Интернационал Молодежи» ибсилизибад бетаахъурси сай или. Дявазир Кимли чумра гъунар сархид. Ким 22 дусла г1ямруличив дявази арякъунсири ва жагъиль г1ямру Ват1ан багъандан, халкъ багъандан харждариб.

Хъулиб 4-5 дурх1я лебтира бахъал чарх1ебухъунти биуб. Машъурси Писки Мях1ли бурули вири, дудеш дявазивад чарх1евхъунх1ели 5 урши-рурси абикус чула нешли сесад къянти чедаibal. Илгъуна къисматла бег1ти хъунул адамти, улкала гъар чинабалра къядали, Ахъушала районнисибра чумилра лебтири!

Чебях1си Ват1а дявази бахъал арбакъунтири мух1ентира. Илдала луг1илизивадси Мях1яммад Даудов, Къурбан Муртазаев, Г1ялиатта Г1ялижанов, Султ1анг1ях1мад Г1язизов, Дайт Бях1яммаев, Бях1муд Г1ябдулаев, Къадарбях1ямма Г1ябдулаев, Мях1яч Къурбанов, Сулейман Г1ялиев, Х1яб1улла Г1ямаров, Ниг1матулла Х1ямидов, Г1ямар Г1ялиев, Къурбан Г1ялиев ва бахъал царх1илти.

Сумен Къурбанов Советский Союзла Игитла уличи лайкыкиб, дявази арбакъунти мух1ентазибад 50-цад офицерла у касили, Г1ях1мадхан Г1исаев биалли

майорла уличил чарбухъун.

Мух1ела шилизибадси Х1унт1ена партизан Г1исаев Г1ябду-саламли дявази х1ябал урши гъунибатур, миц1ирли цалра чарх1евхъун. Айгубов Г1ялисулт1аннара х1ябал урши Ват1ан багъандан бургъес арбакъун ва х1ябалра дявазиб алхун. Илдигъунти хъалибаргун районна шимазир камти ах1енри.

Мух1ела ши г1ибратли бетаури саби дявазиб бургъули калунтала баркъуди хъумх1ертнила, илдала г1ямрула гъуни ва чедашиби къиянти дурх1нас, жагъильтас бяркъ бедлугнилизир, Ват1айчи диги адиликънилизир пайдаладирнила шайчиб.

Ил шилизибадти пергерти педагогуни ва халаси багъудила бег1ти адамти Г1ябдусаламов Х1ямид Г1исаевичли ва Бях1яммаев Мях1яммад Къадиевичли дахъал дусми гъалаб шилизиб музей ак1ахъубсири, сунезира дявата бут1акъянчибала суратуни, илдас дедиби наградаби, газетабазир, журналтазир дурадухъунти белк1ани цаладяхъибси. Шилизири лицейла ва гимназияла буч1анти, музейлизи гъаман башули, ишарти сек1ал чедиули саби ва Ват1ан дигахънила, Ват1айс мардешла шайчиб ишаб г1ях1си дарсра кайсули саби.

Ват1ан багъанданти дявазиб Т1ант1ала шилизибадтира г1ях1цад бургъанти лебтири: Мях1яммад Къурбанов, Мях1яммад Г1ях1мадов, Г1ямар Исмяг1илов, Г1ябдулла Шамакхиев, Булат Мустапаев, Г1яли Къурбанов, Мях1яммад Х1ясилаев, Къурбан Хедаев, Мях1яммад Мансуров, Г1яли Ник1атуев, Рабадан Ях1ъяев, Ражаб Къурбанов, Муса Къурбанов (Ленинград алавбуцибх1ели ил ав калунси), Г1иса Г1ямаров, Нурмях1яммад Г1ямаров, Мустапа Мях1яммадов, узби Шаях1бан ва Мях1яммад Мях1яммадовхъали ва царх1илти.

Т1ант1ала шилизибадси Къурбанов Айгумли дявази авал урши бархъиб: Сулейман, Къурбан, Г1яликъурбан ва Г1ямар.

Бег1гъалаб бак1иб кагъар Сулейман къел-х1ерзи агарли ветахъиб или. Къурбан чарухъун инвалид ветаури, г1яйсначив вашули, шилизиб се лебал сунени барес вируси, цалра барх1и акыли ках1еили узусири. Илала дяхъурби дек1ти урдухъун ва г1ямрулизивад жывли арякъун.

Г1яликъурбан дявти тамандиубх1ели хъули чарухъун, къачагъуни бурцуси отрядлизи керхур. Цагъачам къачагъуни, дугели хъули чарулхъух1ели, илис укабииб ва илдала някъла х1ейкес багъандан Г1яликъурбанни вируг1еб урчи дуц1бариб. Дугила ц1ябдешлизивадси бархъиб урши Г1ямарлисцен къадарбиуб дудешла х1ябличи вашес.

Ахъушала райкомла цаибил секретарыла къуллукъличиб бузули калунти Х1усен Г1яшурланев, Г1ябдулла Г1ямаров, Г1иса Айгубов, Нурмях1яммад Г1яб-

дулаев, Ражабг1яли Г1ямаров ва Мях1яммад Х1ясанов Чебях1си Ват1а дявата бут1акъянчиби сабри.

Урхъучимахылилизивадси Г1ябдулмуталимовхъала хъалибарг цах1набли Дагъистайзивадшиштъурбий—узби, узбала, рузбала дурх1ни, лебилра 12 адам Ват1ан багъандан бургъес арбакъунтири.


Г1ялтимахылилизивадси Г1ябдурах1манов Шарипли ца дявли-зивадшиштъурбий 20 фашист кабушили виънили-зила буруси документ баргибиси сай веб1или г1ергъи,--дявата бут1акъянчибас чула гъунартачила бурес дигули х1ебири...



**Суратлизив: Х1яб1иб
Бях1яндг1ялиев, Ахъуша.**

Х1инт1ала шилизибадси Къурбанов Ник1акъади Белоруссиялизив партизанала отрядда командирли калунсири ва дахъал дявила наградаби касибиси. Ил шилизибадси Хизри Мях1яммадов дявила Асилдешла х1ябалра даражала орденничи лайкыкибиси.

Т1ебекмахылилизивадси Г1ут1ан Ражабов дявти дех1дихъибх1ели флотлизив къуллукъири кали сай. Ца ц1акъси дегълизив дек1ли вяхъили, тухтуттани сагъварес х1ебиуб. Илала кисалаб баргибиси комсомольский билет, илизивадси белк1ра: «Хъя бирулра Советский комсомолецла у ахъли би-хес!». Ражабовла комсомольский билет Республикала музейлизивадшиштъурбий 2014-жылда саби.



**Суратлизив: Умалат
Аскандаров, Къассагумахы.**

МАРЛИ КАЛЕС ДУЗЕХІЕ!



Суратлизив: Мирза Iяжи
Мях1яммадов, Ахъуша.

Дявтала дусмазиб Ленинна орденничи лайкъикибири Ахъушала районнозибад х1ябал адам --Ахъушала шилизибадти дургъбала бут1акъянчиби Мирза Iяжи Мях1яммадов ва Мях1яммад Бя-х1яндов, Гъебала шилизибадси къячагъуначил бургъуси отрядла командир X1ясайни Абакаров.

Дургъбала бахъал бут1акъянчиби лебтири Усишала, X1ямшилага, Дубримахъила Амертк1махъила, Бутрила, Т1ебекмахъила, Сирх1яла шимазиб ва маҳурбазиб. Ишбарх1илис Ахъушала районнозиб Чебях1си



Суратлизив: Мях1яммадзагъир
Х1ясанов, Чиг1инимахъи.

Ват1а дявтала бут1акъянчи цалра миц1ирли агара, бунагъ-хат1а урдуцаб чула!

Мух1ела шила мякълаб калунси Панях1махъилизир ца хъулибад к1ел адам Ват1ан багъандан бургъес арбякъунти дуили сари 28 хъалибарг,--илдигъунти баянти дархъиб редакциялизи ил шилизибадси ца адамли.

Панях1махъила халкъ 1944-ибил дуслизиб чечентала мер-мусаличи гечбарили, 1958-ибил дуслизиб Дағъистайзи чарбариб1ели, хъурабибули саби

Учабулахъла мер-мусаличи, Первомайское бик1уси шилизи. Панях1махъила бишт1аси шилизибад Чебях1си Ват1а дявтази 79 адам арбякъи буили саби.

Миц1ирли агара дявтала дусмазиб дуги-x1ери цадарии бузули, фронтлис ябни адилкули калунти ва Социалист Бузерила Игитла уличи лайкъикибии ти г1яж1гъбза адамтира. Илди сабри Ахъушала шилизибадти Г1ялимх1ов Г1ябдуллагъ, Мя-

х1яммадов Г1ябдуллагъ ва Мух1ела шилизибадси Уллуев Г1ябдуллагъ, х1яб нурли шалабара була!

Чебях1си Ват1а дявтала дусмазиб Ахъушала районна халкъли халаси кумек бариси саби фронтлис. Верховный Главнокомандующий Иосиф Сталинни Райкомла цашибил секретарь X1усен Г1яшурлаевичи баркаллала телеграмма бархъили уили сай ишкъядыа белк1и: «Ахъушала районна халкъли дила шайзидад баркалла багъахъи Севастополь шагъар сарабарахъес дучили арц дархънилис, фронтовикунас ва илдаа хъалибаргунас продуктуначил кумек г1еббуцнилис!».

Дявтала дусмазиб Ахъушала районна халкъли фронтлис бариси кумекличида г1яж1ти баянти дучили сари районна музеяла директор Зубалжат Мирзаева къайгъиличил х1ядурбарили, гъалаван дурабухъунси жузлизи. Ил жузлизи бурули саби Мух1ела С.Кировла уличилис колхозли оборонала фондлизи дедили дильниличила 200 уркура, 55 урчи, 1200 килограмм рангла металла, 800 гули, бургъантас 110 азир къурушла къадарлизир савгъатуни, авиаэскадрильялис – 230 азир къуруш, танкабала колонналис – 210 азир къуруш.

Ахъушала Ленинна уличилис колхозли фронтовикунас кумеклис дархъили сари 1432 свитер, 1,5 миллион къуруш арцла. Гъарил шилизирад дучили, дурхъутири фронтлизи ванати палтар, урчи-уркура, арц, берк-бержла продуктунни. Цах1набли Ахъушала районни 1942-ибил дуслизиризун дархъили сари оборонала фондлизи 5 миллион къуруш арцла, даршал тонналичирра имц1али ризкыи, бала, дис ва царх1илтира продуктуни.

Чедибешла Барх1ила байрам – ил Ахъушала районна халкълис дебали дигуси, халаси х1урматличил дурабурк1уси байрам саби. Лерилра шимазирти Ват1ан багъандан алхунти гъанбиркахъес дарити памятникуни ремонтдарили, алавчарти мерани къулайси агиличи душили, далкъара хули сари ва илдаа мякълар школабала буч1антани, жагъилтани бут1акъяндеш дирути шадлихъуни детурхули сари. Дурх1нази, чехалабиутази багъахъес, сесад халаси къияйчил, чум адамли жан харждарили сархибисил Чедибеш – халаси къияйчи бибули саби багъудила, культурала, жагъилтала политикала ва спортла учреждение базиб бузутани, хаслира учительтани.

Ахъушала шилизибиси Чебях1си Ват1а дявтазиб алхунти гъанбиркахънилис багъишлабариси памятникуни гъалар гъар дуслизир майла 9-ибил Барх1ила байрамлис багъишладарити балбуцунни детурхули дира.

Араг1ебли Россиялизиб дурабурк1уси «Вахта Памяти» ибси уличилис акциялизи районра бархбикили, гъарил шилизир памятникунала гъалар, багъудила, культурала учреждение базиб балбуцунни детурхули сари.

«Ахъушала район» МО-ла жагъилтала политикала ва спортла, культурыла ва туризмала, районна администрацияла багъахънибала политикала ва СМИ-бачил бархбас бузахънила управлениебала х1янчизартани, школабала буч1антани, учительтани бут1акъяндеш дирули саби районна центрлизир детурхути балбуцуназир.

Памятникличи вавни кадирхънилис хасбарибси балбуцличиб жавабла х1янчизартти гъайбухъи, дурх1назир Ват1айчи диги адилкънила шайчиб халаси мяг1-на лебси баркъудили бетараҳули саби илгъуна балбуц.

--Ишдуслизир Чебях1си Чедибеш сархибх1ейчирад 78 дус диркули сари. Сесад замана арбукъяллира хъумартес асуҳ1ебираар Ват1ан багъандан чула жан харждариби бургъантала гъунарти ва гъабзадеш. Илдачилла хабар ва Чедибешла х1урмат наслуличирад наслуличи дашули кавлан.—вик1ули сай «Ахъушала район» МО-ла администрацияла бек1 Мях1яч Г1ябдулкаримов.

--Ишдигъунти балбуцунни нушани дурадурк1ути сари чехалабиути дурх1нази ва жагъилтази аргъахъес чула халабег1тани чедаахъиби гъабзадешличида, сабира нушаб ишбарх1и даршудеш ва азаддеш сархес багъандан бургъули калунти.—буриб районна жагъилтала политикала ва спортла управлениела начальник Шамил Зугъумовли.

Царх1илван биэсра асуҳ1ебираар, сенах1енну Россия-алав ишбарх1ира гъар журала вайбаркъунира, макру-г1ямултира, къунбира сесад-дигара лер. Лерилра илдачил чедибикили, Чебях1си Чедибешла х1урмат ахъли калхъес багъандан Россияла халкълис х1яжатли саби ч1умали дих1ес цадеш, уржибеш, Ват1айс мардеш.

Чедибешла Барх1ила у челябъяллизибра зяйбик1ули калхъес багъандан нушазивад гъарилли къайгъи барес чебиси бетарули саби, гъанбикахъили жагъил г1ямруличиб Ват1ан багъандан жан дедибтира, концлагерьтазиб ва гаши-дяг1язиб алхунтира – лебилра 27 миллион адам!

Чебях1си Чедибеш сархили г1ергъи нушала улкала халкълис мажах1ят гъанбиркули бинши дявила анц1букуни г1урра чедуркъес асубиар или. СССР лебх1ели бургъантачи хъардикиб Венгриялизирти, Чехословакиялизирти, Афганистаннозири дявила анц1букуни, чузибра бахъал бургъанталаш ахъли гъамли советский бургъанталаш тибкини саби.

Гитлерла фаизмаличибад чедибеш сархибиси къуватси пачалихъ-- СССР бехъуб. Ил анц1букулизиб г1яйибла бег1ти сабри улкалис бек1дешдирти адамти— Штатунас бирг1ябиули, Западла г1ямултаки шакх1ебикиби.

Гъанна биалли Штатунаи ва Запад дузули сари Россия т1ут1убарес. Илгъуна къасличил НАТО гъамбик1ахъули саби Россияличи, гъар журала вайбаркъуни дяж1чи-



Суратлизив: Хизри
Мях1яммадов, Х1инт1ала ши.

аили, Украинала мер-мусаличиб

сагали абиқурси фаизм биру-

г1еб г1еббуцили саби.

Штатунаи ва Западли гъалар СССР-лизи кадурхули дууби республикабира булан Россияли- чи ц1акъти къаршидешла гъуй- чи каили сари. Ишди бурх1назир телевидениеца ца канализират тикрардариб Эстонияла прези- дентла гъай. Ил вик1ули сай: «Россия хамли саби—халаси ва къуватси сабх1ели. Нушаб г1яг1- нибиркур ил даҳъал бут1ачи- бут1или, чула бух1набра бирх1я- хули, Россияла хамдешлис ахир



Суратлизив: Чамкур
Г1ямшими.

кабихъес!» Сегъунти къасаначил х1ербирулил Россияличи гъими- чебибути адамти! Илдала къаса- ни дех1ерхъес, Россияла цадеш- калахъес бургъули саби ишбарх1и СВО-лизиб Россияла бургъанти.

Дагъистан Республикала Бек1 Сергеј Меликов ДР-ла Халкъла Собраниеличи Дугъабизличил гъайулхъух1ели буриб, чумал дус гъалаб нушаб гъанбиркули х1еби- аллира дявила анц1букуни чедуркъес асубиар или, СВО дурах1е- берк1ес г1ямалагарсили бетаахъур или Россияла душмантани--Россия т1ут1убарес бузутани. «Илаб Россияла къисмат ирзули саби». --ил- гъуна къимат бедиб С. Меликов- ли Россия багъандан бургъутала баркъудилис.

Аллагъли г1еббуцаб саби ва арасагъли чарбухъаб, сархили сагаси Чедибешра!

П. Маллаева.

★ БАРКАЛЛА, ХАЛАДУДЕШ, ЧЕДИБДЕШ САРХНИЛИС! ★



Суратлизив: М. Будунов.

калунси илдазивад цалра агара. Ватлан багъандан бургъес арбякъунтири дила келра халадудеш.

Гъях1мадов Г1исала чебкад 1942-ибил дуслизиз бег1таси бак1убсири къудкъуси кагъар «Х1ушала урши къел-х1ерзи агарли ветахъби» или. Итил халадудеш --Будунов Мях1яммад дявтазивад чарухъунсири, къянлира калунсири.

М. Будунов ак1убсири Ахъушала шилизив, 1922-ибил дусла мартла 4-личив хъубзарла хъалибарглизив. 1941-ибил дуслизир Чебях1си Ватла дявти дех1дихъибх1ели дургъбази аркъунсири. Илини наградабира сархиб: «орден Отечественной войны», медаль «За отвагу», медаль «За боевые заслуги» бик1ути.

Чедибешла байрамлис халадудешла михъирличи даршиби ордентачи ва медальта-

чи х1ердик1ес иштаях1дулхъутири.

Илини бурули вири, се-цад ц1акъти дявти саррил, секъядыа цабиубли Ватлан батахъес лерила милилатуна адамти бургътирил. Гъандиркахъи итди кахти, къянти, гушти, дуг1ярти дусми.

Илини бурни х1ясибли, 1943-ибил дуслизив бек1лизивад вяхъили, аргъала агарли авлахъличив калунсири. Чеваргъибх1ели, ца урус солдатли, сайра вяхъили хъалли, сунела дяхъурбачи х1ерх1ейк1ули, ухиси сай дергъла майдайчивад санчастьлизи, чумал километрлици. «Вархъатаба, ну миц1ирли как1евлус, х1ела г1ямру дерцахъа» вик1улихъали, ветаахъили сай.

Итх1ели адамти чучила пикрибик1ули буилив? Илданни царх1иллис чузибад

лябкъуси кумек бирули буили саби. Илкъайда г1ямрүдерцахъиб урус дурх1яни или бурули вири.

Будунов Мях1яммадли 12 урши-рурси абикур. Г1ях1си бяркъ бедиб, ба-гъуди касахъиб, хъайчи кабатур. Илдазибад шелра уршини Ватлан къуллукъ-бариб. Дудеш сунела дурх1нази вик1уусири «Мурул адамличиб вег1ла Ватлан батахъес чебла саби» или.

Мях1яммад Будунов даб-румала уста сайри, пергерси, духуси, адамтази г1якълу буруси, адамтала ургала балиркахъуси, шантани х1урмат бирузи. Буда Мя-х1яммад 2002-ибил дуслизив мартла 3-личив 80 дусла г1ямруличив ахиратла хъули аркъун,--бунағъятла урдузаб сунела!

А. Мях1яммадова,
нушала корр.



ГАЗЕТАЛА
БЕК1 РЕДАКТОР
П.Ш.МАЛЛАЕВА



РЕДАКЦИЯЛА АДРЕС:
368280,
Ахъушала район,
Ахъушала ши,
«Бархъдешла гъуни»
ГАЗЕТАЛА РЕДАКЦИЯ.
сайт: путь истины.рф
эл.почта:put-istiny@mail.ru



ГАЗЕТА
КАВЯХЪИБСИ САБИ
Мях1ячкъалализиби
«ИЗДАТЕЛЬСКИЙ ДОМ
ДАГЕСТАН»
ТИПОГРАФИЯЛИЗИБ.

АДРЕС
ИЗДАТЕЛЯ И ТИПОГРАФИИ:
РЕСПУБЛИКА ДАГЕСТАН,
ПР. ПЕТРА ПЕРВОГО, ДОМ №61
ТИПОГРАФИЯ «ИЗДАТЕЛЬ-
СКИЙ ДОМ ДАГЕСТАН»,
ТЕЛ. 88722-65-00-51.



ГАЗЕТА
ЖУМЯГ1 БАРХ1И
ДУРАБУЛХЪУСИ САБИ



Къулбасбируси замана
17 сяг1ят.
Къулбасбариби
замана 17 сяг1ят.



АВТОРТАНИ
ЧУЛА БЕЛК1АНАЛА
Х1ЕКЪДЕШЛИС ВА
БАРХЪДЕШЛИС ЖАВАБ
ЛУГУСИ САБИ.



ГАЗЕТАЛИС
КЪУЛБАСБАРЕС ВИРАР
ПОЧТАЛА
ОТДЕЛЕНИЕБАЗИБ.
ГАЗЕТАЛА ИНДЕКС 51345
ТИРАЖ 1000 ЭКЗ.



★ БУТРАНТИ--ДУРГЪБАЛА БУТ1АКЬЯНЧИБИ ★



Суратлизив: XI. Хляжнев.

Дахъал къянти, гашадяг1и чедаити атамтазивад ца сайри Бутрила шилизивадси Х1яжи Х1яжиев. Ил ак1убсири 1909-ибил дуслизив, 1941-ибил дусла июлья-1личив ил сай г1ях1ъули дявтази аркъунсири. Сталинград ва Курск шагъурти акъудатахъес кадикиби дявтазирра илини бут1акъяндеш дариб. Илкъайдали, ил Польшала мер-муса ва Прага шагъар акъудатахъесра ургъули калун.

Чедибеш сархес бахъандан дахъал гунзри кац1или Берлин ша-гъарлизи веташиб. Да-вила авал ордентачил ва

дахъал медальтачил ша-багъатлаварибсири.

Бутрила шилизивадти бургъантала луг1илизив леб Рабадан Ражабов, Х1ясайни Исмяг1илов, Ибрагим Гулбях1яммадов, Къурбан Х1яжиев, Х1ясан Г1ялиев – илди 1-ибил даражала Ватла дявтала ордентачил ша-багъатлаварибири. Ражаб Рабаданов, Къади Бях1яммадов - Чебях1си Ватла дявтала 2-ибил даражала ордентачил. Мях1яммад Нурмях1яммадов, 1916-ибил дуслизив ак1убси, 1941-ибил дуслизив дявтази арукибсири, 1942-ибил дуслизив къел-х1ерзи агарли



Суратлизив: Р. Ражабов.
веткахъиб, илкъяйдали,
Мухтар Къурбанисмяг1иловра 1944-ибил дус-
лизив веткахъиб.

С.Г1ябдуллаева,
нушала корр.

★ Р. Х1ЯМЗАТОВ: «КЪУРГЪИ» («ЖУРАВЛИ») ★

Наб гъанбиркули бирар, дявтазиби бургъанти,
Х1ила авлахъуачиб убкаунти г1ях1гъубни,
Кабихъили х1ебургат или иш ванзализи,
Шуркабухъи саб или илди ц1уб арцантачи.

Итх1ейчибадли илди урцули саб заклизиб,
Арцурли саб гъаннара, нушази жибик1ули,
Ах1енрара илистра, заклизи вякъайзурли,
Хумарли ва марайли нушара лех1кайхъути?

Барх1и ихъуси манзил ишбарх1ира заклизир
Чедиулра арцанти арцурли дирихъмазир,
Жагаси низамлизир, итх1ели бургъантиван
Да-вила авлахъкадли гъалабях1и бетухъунти.

Арцурли сари илди, гъарахъ гъуни ихъули,
Чила-сарил умира дурутыван сар чули,
Ах1ен вара илистра къургъала г1амаличи
К1арахъан девла г1ама даршдусмазиб мешуси?

Арцурли саб, арцурли бамсурси х1енкъ къургъала
Барх1и ихъуси манзил дирахъла хъянц1дешлизиб,
Чула-ургаб цакамси батури саби мерра—
Ах1ен вара илдани ил мер батурси набра!

Сабиур ца барх1ира, къургъала х1енкъличил варх
Нура урцус илдачил илгъуна хъянц1дешлизи,
Ванзаличир даймлис нуни г1елар датурти.
Арцанван жник1ули заклизивад х1ушази!

Дарган мезличи шурбатурси Баркакъади Мусаев, Бурх1имякъмахъи.

ПОДДЕРЖАЛИ ВСЕРОССИЙСКУЮ АКЦИЮ «ГЕОРГИЕВСКАЯ ЛЕНТА»



На снимке: учительница Акушинской СОШ №1 Курбанова Л. К. с учащимися в ходе акции.

Активисты Акушинского района присоединились к Всероссийской акции «Георгиевская лента», которая проходит по всей Республике в рамках празднования 78-й годовщины Победы в Великой Отечественной войне 1941-1945 годов.

Целью акции является формирование у детей уважительного отношения к исторической памяти своего народа.

В ходе акции волонтеры, учащиеся 10^б и 9^б классов Акушинской

СОШ №1 им. С. М. Кирова раздали работникам образовательных организаций и жителям района георгиевские ленты-символ воинской славы, знаменующий героизм, мужество и стойкость народа в ходе военных действий и при выполнении боевых задач по защите Отечества.

Акция стартовала 25 апреля и продлится до 10 мая сего года.

Пресс-служба администрации МО «Акушинский район».



ГАЗЕТАЛА
БЕК1 РЕДАКТОР
П.Ш.МАЛЛАЕВА



РЕДАКЦИЯЛА АДРЕС:
368280,
Ахъушала район,
Ахъушала ши,
«Бархъдешла гъуни»
ГАЗЕТАЛА РЕДАКЦИЯ.
сайт: путь истины.рф
эл.почта:put-istiny@mail.ru



ГАЗЕТА
КАВЯХЪИБСИ САБИ
Мях1ячкъалализиби
«ИЗДАТЕЛЬСКИЙ ДОМ
ДАГЕСТАН»
ТИПОГРАФИЯЛИЗИБ.

АДРЕС
ИЗДАТЕЛЯ И ТИПОГРАФИИ:
РЕСПУБЛИКА ДАГЕСТАН,
ПР. ПЕТРА ПЕРВОГО, ДОМ №61
ТИПОГРАФИЯ «ИЗДАТЕЛЬ-
СКИЙ ДОМ ДАГЕСТАН»,
ТЕЛ. 88722-65-00-51.



ГАЗЕТА
ЖУМЯГ1 БАРХ1И
ДУРАБУЛХЪУСИ САБИ



Къулбасбируси замана
17 сяг1ят.
Къулбасбариби
замана 17 сяг1ят.



АВТОРТАНИ
ЧУЛА БЕЛК1АНАЛА
Х1ЕКЪДЕШЛИС ВА
БАРХЪДЕШЛИС ЖАВАБ
ЛУГУСИ САБИ.



ГАЗЕТАЛИС
КЪУЛБАСБАРЕС ВИРАР
ПОЧТАЛА
ОТДЕЛЕНИЕБАЗИБ.
ГАЗЕТАЛА ИНДЕКС 51345
ТИРАЖ 1000 ЭКЗ.

